

Seggt Gott, den' Vadder, Dank mit Bäden, Daun un Singen;
mit Tauvertrug'n un Leiw up't Best em Ihr daut bringen;
nich bloots mit näbenbi hensmäten „Gott sei Dank!“,
ok nich an' Sünndag man un in 'ne Kirchenbank.

Seggt Gott, den' Vadder, Dank in jug' dagdäglich Läben!
Hett hei nich männigmal sien Leiw tau kennen gäben?:
Wo hei jug' hett bewohrt, mit Gaben ok uträsst –
un siene Vadderleiw uns wiest in Jesus Christ?

Seggt Gott, den' Vadder, Dank! De Radels von uns Läben,
alls, wat wi nich verstahn, will hei 'ne Lösung gäben;
uttüfteln koen'n wi s' nich. Doch wat wi maken koen'n,
is dat, mit Jesus alls tau legg'n in Gott sien Hänn'.

Seggt Gott, den' Vadder, Dank un bäd't em alltausamen,
as hei jug inlad't hett, mit Tauvertrug'n tau kamen:
Du, Vadder, holl uns fast, tau blieben up dien' Weg;
un wenn wi stolpern daun, denn bring uns wedder trecht.

Mel.: Nun danket alle Gott (EG 321)
Chr. Voß

Ihr – Ehre / hensmäten – hingeworfen / männigmal – manches Mal / Radels – Rätsel / uttüfteln - ausklügeln